

ZAKON O PLATAMA I DRUGIM NAKNADAMA SUDIJA I TUŽILACA U BRČKO DISTRIKTU BIH

("Službeni glasnik Brčko distrikta BiH", br. 17/2022 - prečišćen tekst, 21/2022, 45/2022 i
17/2023 - odluka AS i 23/2024)

I. OPŠTE ODREDBE

Član 1

(Predmet)

- (1) Ovim zakonom regulišu se plate, naknade i određena prava sudija i tužilaca u Brčko distriktu Bosne i Hercegovine.
- (2) Sudiji i tužiocu utvrđuje se osnovna plata na mjesečnom nivou.
- (3) Visina osnovne plate utvrđuje se ovim zakonom.
- (4) Plata zaposlenog se sastoji od osnovne plate ili naknade plate i uvećanja plate po osnovu dodatka na platu.
- (5) Bruto plata je plata iz stava 4 ovog člana uvećana za obavezne doprinose.
- (6) U svim elementima koji čine platu iz stava 4 ovog člana sadržan je porez na dohodak.
- (7) Naknada za pripravnost, dežurstvo, prekovremeni rad, rad u neradne dane, noćni rad, rad u dane državnih praznika i za godišnji odmor obračunava se i isplaćuje kao dodatak na platu.

II. PLATE, DRUGA PRAVA I NAKNADE

Član 2

(Osnovna mjesečna plata sudija)

Osnovna mjesečna plata sudija iznosi:

- a) za sudiju Osnovnog suda Brčko distrikta BiH 3.333,33 KM;
- b) za predsjednika odjeljenja Osnovnog suda Brčko distrikta BiH 3.555,56 KM;
- c) za predsjednika Osnovnog suda Brčko distrikta BiH 4.000,00 KM;
- d) za sudiju Apelacionog suda Brčko distrikta BiH 4.000,00 KM;
- e) za predsjednika odjeljenja Apelacionog suda 4.222,22 KM;
- f) za predsjednika Apelacionog suda 4.444,44 KM.

Član 3

(Osnovna mjesečna plata tužilaca)

Osnovna mjesečna plata tužilaca iznosi:

- a) za tužioca Tužilaštva Brčko distrikta BiH 3.333,33 KM;
- b) za zamjenika glavnog tužioca Tužilaštva Brčko distrikta BiH 3.666,67 KM;
- c) za glavnog tužioca Tužilaštva Brčko distrikta BiH 4.333,33 KM.

Član 4*

(Dodatak na radni staž)

Osnovna mjesečna plata svakog sudije i tužioca iz člana 2, odnosno 3 ovog zakona povećava se za 0,5% za svaku punu godinu radnog staža, najviše do 40 godina.

Član 5*

(Regulisanje osnovne mjesečne plate)

1. Plaće propisane članovima 2 i 3 ovog zakona neće se povećavati sve dok prosječna mjesečna neto plaća u Bosni i Hercegovini izračunata za kalendarsku godinu ne dostigne ili ne pređe iznos od 800 KM.
2. Počevši od godine koja uslijedi nakon godine u kojoj prosječna mjesečna neto plaća u Bosni i Hercegovini izračunata za kalendarsku godinu po prvi put dostigne ili pređe iznos od 800 KM, osnovne mjesečne plaće sudija i tužilaca propisane članom 2 odnosno 3 će se godišnje korigovati za procenat povećanja prosječne mjesečne neto plaće u Bosni i Hercegovini.
3. Procenat povećanja iz stava 2 ovog člana izračunat će se tako što će se uporediti prosječna mjesečna neto plaća u Bosni i Hercegovini za kalendarsku godinu s prosječnom mjesečnom neto plaćom u Bosni i Hercegovini iz prethodne kalendarske godine.
4. U slučaju da se u nekoj godini prosječna mjesečna neto plaća u Bosni i Hercegovini izračunata za kalendarsku godinu smanji, osnovne mjesečne plaće sudija i tužilaca ostaju iste i neće se ponovo povećavati sve dok prosječna mjesečna neto plaća u Bosni i Hercegovini izračunata za kalendarsku godinu ne dostigne najviši nivo od prvog povećanja plaća u skladu sa stavom 2 ovog člana. Nakon toga, plaće sudija i tužilaca se povećavaju u skladu sa stavom 2 ovog člana.
5. Prosječna mjesečna neto plata za kalendarsku godinu bit će ona plata koju bude objavila Agencija za statistiku Bosne i Hercegovine.

Član 6

(Radno vrijeme)

1. Broj radnih sati za sudije i tužioce je 40 sati sedmično.

2. Ukoliko sudija, odnosno tužilac radi pola radnog vremena, u skladu s posebnim zakonom ili propisima, osnovna mjesečna plata iz člana 2 odnosno 3 ovog zakona, korigovat će se u skladu s brojem odrađenih dana u odnosu prema broju redovnih radnih dana za taj mjesec.

Član 7

(Plaćeni godišnji odmor i odsustvo za vjerske praznike)

1. Sudije i tužioci imaju pravo na plaćeni godišnji odmor u trajanju od 30 radnih dana.
2. Ukoliko je kalendarski period do prestanka radnog odnosa kraći od 30 radnih dana, sudija ili tužilac može koristiti onoliko dana godišnjeg odmora koliko mu to kalendarski omogućava period do prestanka radnog odnosa.
3. Pored prava na godišnji odmor definisanog u stavu 1 ovog člana, sudije i tužioci imaju pravo na dva plaćena i dva neplaćena dana odsustva godišnje za zadovoljenje vjerskih obaveza.
4. Sudije i tužioci imaju pravo na naknadu za godišnji odmor u iznosu od 50% osnovne mjesečne plate iz člana 2.a, odnosno 3.a.
5. Naknada za godišnji odmor plaća se kao dodatak na platu u julu svake godine, bez obzira na to kada se koristi godišnji odmor, osim u slučaju prestanka radnog odnosa prije mjeseca jula te godine, kada se naknada za godišnji odmor isplaćuje kao dodatak na posljednju platu koju je sudija ili tužilac ostvario prije prestanka radnog odnosa".
6. Plaćeni godišnji odmor za svakog sudiju i tužioca biće regulisan planom godišnjih odmora koji će odrediti predsjednik suda ili glavni tužilac na godišnjoj bazi u skladu s propisima o unutrašnjem poslovanju predmetnog suda, odnosno tužilaštva.

Član 7a

(Naknada za prekovremeni rad, rad u neradne dane, noćni rad i rad u dane državnih praznika)

U slučaju pripravnosti i dežurstva, prekovremenog rada, rada u neradne dane, noćnog rada ili rada u dane državnih praznika, sudija i tužilac imaju pravo na naknadu u skladu s podzakonskim aktom koji donosi Pravosudna komisija Brčko distrikta Bosne i Hercegovine.

Član 8

(Vanredno plaćeno odsustvo)

Pored godišnjeg odmora i odsustva za vjerske praznike regulisanog članom 7 ovog zakona, sudije i tužioci imaju pravo na sedam plaćenih dana odmora u kalendarskoj godini kako slijedi:

1. U slučaju ženidbe/udaje: 5 dana;
2. U slučaju smrti bliskog srodnika (supružnika, partnera, majke, oca, očuha, maćehe, djeteta, pastorka/pastorke, brata, sestre, polubrata, polusestre): 3 dana;
3. U slučaju smrti manje bliskog srodnika (djeda, bake ili bliskog srodnika bračnog druga ili partnera): 1 dan;

4. U slučaju rođenja djeteta: 2 dana;

5. U slučaju selidbe iz stalnog prebivališta u drugo prebivalište; 1 dan.

Član 9

(Plaćeno odsustvo)

1. Visoko sudsko i tužilačko vijeće može odlučiti da sudija, odnosno tužilac nastavi da prima svoju platu tokom odsustva koje mu odobri Visoko sudsko i tužilačko vijeće u skladu s članom 17 tačkom 13 Zakona o Visokom sudskom i tužilačkom vijeću Bosne i Hercegovine (Službeni glasnik Bosne i Hercegovine, broj 25/04).

2. Visoko sudsko i tužilačko vijeće u saradnji s Pravosudnom komisijom Brčko distrikta, izdaje propise u vezi s okolnostima pod kojima sudija, odnosno tužilac nastavlja da prima platu tokom odsustva definisanog u stavu 1 ovog člana.

Član 10

(Naknada prilikom odlaska u penziju)

Sudija i tužilac imaju pravo na naknadu pri odlasku u penziju (otpremninu) u visini svojih pet ostvarenih prosječnih neto plata isplaćenih u prethodnih pet mjeseci.

Član 11

(Zdravstveno osiguranje i bolovanje)

Sudije i tužioci imaju pravo na zdravstveno osiguranje i bolovanje u skladu s važećim Zakonom o zdravstvenom osiguranju u Brčko distriktu.

Član 12

(Penzijsko i invalidsko osiguranje)

Sudije i tužioci imaju pravo na penzijsko i invalidsko osiguranje u skladu s važećim zakonom o penzijskom i invalidskom osiguranju u Republici Srpskoj ili u Federaciji Bosne i Hercegovine, zavisno od fonda u koji su uplaćivali doprinose.

Član 12a

(Jednokratna novčana pomoć)

U slučaju povrede na radu sudije ili tužioca, teške bolesti ili invalidnosti sudije ili tužioca ili člana njegove uže porodice, isplaćuje se jednokratna novčana pomoć u visini od dvije prosječne neto plate isplaćene u Brčko distriktu Bosne i Hercegovine prema zadnjem objavljenom statističkom podatku.

Član 12b

(Naknada troškova za slučaj smrti)

(1) U slučaju smrti sudije ili tužioca, članovima njegove uže porodice isplaćuju se troškovi sahrane u visini od četiri prosječne neto plate isplaćene u Brčko distriktu Bosne i Hercegovine prema zadnjem objavljenom statističkom podatku.

(2) Članom uže porodice sudije ili tužioca, u smislu člana 12a i stava 1 ovog člana, smatraju se bračni i vanbračni drug, dijete (bračno, vanbračno, usvojeno, pastorče i dijete bez roditelja uzeto na izdržavanje do osamnaeste (18.) godine, odnosno do dvadeset šeste (26.) godine starosti ako se nalaze na redovnom školovanju i nisu u radnom odnosu, a djeca nesposobna za rad bez obzira na starosnu dob), roditelji (otac, majka, očuh, maćeha i usvojioци), braća i sestre bez roditelja do osamnaeste (18.), odnosno do dvadeset šeste (26.) godine ako se nalaze na redovnom školovanju i nemaju drugih prihoda već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, i unučad ako nemaju roditelja i žive u zajedničkom domaćinstvu sa sudijom ili tužiocem.

(3) Naknada iz stava 1 ovog člana isplaćuje se i u slučaju smrti člana uže porodice sudije ili tužioca.

(4) Troškovi sahrane iz stava 1 ovog člana isplaćuju se samo jednom zaposlenom članu porodice.

Član 13

(Naknade za putne troškove)

Sudije i tužioci imaju pravo na naknadu za troškove nastale u toku službenog putovanja (dnevnice, prevoz i smještaj) u skladu s važećim Pravilnikom za zaposlene u pravosuđu Brčko distrikta, i odobrenim budžetom Suda ili Tužilaštva.

Član 13a

(Naknada troškova za ishranu u toku rada)

(1) Ishranu (topli obrok) za jedan radni dan za puno radno vrijeme, kao i za prekovremeni rad duži od tri sata u toku jednog radnog dana, u iznosu od 8,00 KM (osam konvertibilnih maraka) za vrijeme provedeno na radu.

(2) Pravo na naknadu za putne troškove iz člana 13 ovog zakona isključuje pravo na naknadu za ishranu u toku rada.

Član 13b

(Naknada troškova prevoza na posao i prevoza s posla)

(1) Sudije i tužioci imaju pravo na naknadu troškova prevoza na posao i prevoza s posla.

(2) Kriteriji, visina i način obračuna naknade troškova prevoza na posao i prevoza s posla iz stava 1 ovog člana, pod istim uslovima i iznosima propisanim za zaposlene u pravosuđu Distrikta, uređuju se Pravilnikom.

(3) Pravilnik iz stava 2 ovog člana donosi Pravosudna komisija Brčko distrikta Bosne i Hercegovine u roku od tri mjeseca od stupanja na snagu ovog zakona.

Član 14

(Naknade za troškove edukacije)

Sudije i tužioci imaju pravo na naknadu za troškove nastale u toku edukacije u skladu s propisima o unutrašnjem poslovanju Suda ili Tužilaštva i odobrenim budžetom Suda ili Tužilaštva.

Član 15

(Naknada za upućivanje u drugi sud sa ili bez pristanka sudije)

U slučaju upućivanja sudije da vrši dužnost sudije u drugom sudu u skladu s članom 50 ili 51 Zakona o Visokom sudskom i tužilačkom vijeću, taj sudija ima pravo na naknadu za troškove u skladu s odredbama koje donosi Visoko sudsko i tužilačko vijeće u saradnji s Pravosudnom komisijom Brčko distrikta.

III. ZAVRŠNE ODREDBE

Član 16

(Stavljanje odredaba van snage)

Odredbe sadržane u drugim zakonima, propisima ili odlukama Brčko distrikta koje su u suprotnosti s odredbama ovog zakona, prestaju da važe danom stupanja na snagu ovog zakona.

Član 17

(Objavljivanje i stupanje na snagu)

Zakon o platama i drugim naknadama sudija i tužilaca u Brčko distriktu BiH je stupio na snagu 1. januara 2006. godine, a njegove izmjene i dopune 13.juna 2014.godine (primjenjuju se od 1.1.2015. godine), 14.novembra 2019.godine, 4.novembra 2020.godine (primjenjuju se od 1.1.2021.godine) i 18.decembra 2021.godine (odredba člana 2 primjenjuje se od 1.10.2021.godine).

Samostalni član Zakona o izmjenama i dopunama
Zakona o platama i drugim naknadama sudija i tužilaca u Brčko distrikta BiH

("Sl. glasnik Brčko distrikta BiH", br. 21/2022)

Član 7

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH, a primjenjuje se od 01.07.2022. godine.

Samostalni član Zakona o izmjeni
Zakona o platama i drugim naknadama sudija i tužilaca u Brčko distrikta BiH

("Sl. glasnik Brčko distrikta BiH", br. 45/2022)

Član 2

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH, a primjenjivat će se od 1. 1. 2023. godine.

Samostalni član Zakona o izmjenama i dopunama
Zakona o platama i drugim naknadama sudija i tužilaca u Brčko distrikta BiH

("Sl. glasnik Brčko distrikta BiH", br. 23/2024)

Član 4

(1) Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.